

JO'ĒL

Joël

1 Die woord van יהוה wat na Jo'ël, die seun van Petu'ël, gekom het.

² Hoor dit, oudstes, en luister, al julle inwoners van die land! Het dit in julle dae of selfs in die dae van julle vaders gebeur?

³ Vertel dit aan julle kinders, en julle kinders aan hulle kinders, en hulle kinders aan 'n volgende geslag.

⁴ Wat die afknyper laat oorbly het, het die sprinkaan gevreet, en wat die sprinkaan laat oorbly het, het die voetganger gevreet, en wat die voetganger laat oorbly het, het die kaalvreter gevreet.

⁵ Word wakker, julle dronkaards, en huil. En sanik, al julle wyndrinkers, weens die mos, omdat dit van julle mond afgesny is.

⁶ Want 'n nasie het teen My land opgekrom, sterk en ontelbaar. Sy tande is leeu-tande, en dit het slag-tande soos 'n leeu-wyfie.

⁷ Dit het My wingerdstok verwoes en My vyeboom versplinter. Dit het dit totaal gestroop en weggegooi, die ranke het wit geword.

⁸ Treur soos 'n jongmeisie omgord met 'n roukleed, oor die man van haar jeug.

⁹ Graanoffer en drankoffer is afgesny van die Huis van יהוה. Die priesters, die dienaars van יהוה, treur.

¹⁰ Die veld is verwoes, die grond treur, want die koring is verwoes, die mos het opgedroog, die olie het misluk.

¹¹ Die landbouers is skaam, die wynboere skreeu oor die koring en oor die gars, want die oes op die land is vernietig.

¹² Die wingerdstok het verdroog, en die vyeboom het verwelk, die granaat, ook die palm en die appelboom, al die bome van die land het verdroog, want vreugde, van die mensekinders het opgedroog.

¹³ Omgord julle en treur, priesters! Skreeu,

dienaars van die altaar! Kom, oornag in rouklere, dienaars van my Elohim! Want die graanoffer en die drankoffer van die Huis van julle Elohim weerhou.

¹⁴ Sonder 'n vasdag af! Roep 'n vergadering saam, versamel die oudstes, alle inwoners van die land in die Huis van יהוה julle Elohim, en roep na יהוה.

¹⁵ Ag, die dag! Want die dag van יהוה is naby, en dit kom soos 'n vernietiging van die Almagtige.

¹⁶ Is die voedsel nie voor ons oë afgesny, blydskap en vreugde uit die huis van ons Elohim nie?

¹⁷ Die saad het verrot onder hulle kluite, die pakhuis is verwoes, die graanskure afgebreek, want die graan het uitgedroog.

¹⁸ Hoe kreun die vee! Die troppe beeste is onrustig, want hulle het geen weiveld nie. Ook die troppe kleinvee moet vergaan.

¹⁹ Ek roep na U, יהוה, want 'n vuur het die weivelde van die woestyn verteer, en 'n vlam het al die bome van die veld aan die brand gesteeek.

²⁰ Selfs die diere van die veld smag na U, want die waterstrome het opgedroog, en 'n vuur het die weivelde van die woestyn verteer.

2 Blaas 'n ramshoring op Tsjion, en maak alarm op My afgesonderde berg! Laat al die inwoners van die land bewe, want die dag van יהוה kom, want dit is naby:

² 'n Dag van donkerte en duisternis, 'n dag van wolke en digte duisternis. Soos die dagbreek uitsprei oor die berge, kom 'n volk, talryk en magtig, sy gelyke was nog nooit nie en sal hierna ook nie wees tot in die jare van die verste geslagte nie.

³ Voor hulle verteer 'n vuur, en agter hulle brand 'n vlam. Voor hulle lyk die land

soos die Tuin van Eden, en agter hulle is dit 'n woeste wildernis. En daar is geen ontsnapping van hulle nie.

⁴ Hul voorkoms is soos die voorkoms van perde, en hulle hardloop net soos ryperde.

⁵ Soos die lawaai van waens spring hulle oor die bergtoppe, soos die lawaai van 'n vlammeende vuur wat stoppels verteer, soos 'n magtige volk wat vir die geveg opgestel is.

⁶ Voor hulle bewe die volke van angs, alle gesigte verbleek.

⁷ Hulle hardloop soos helde, hulle klim die muur soos krygsmanne, elkeen gaan sy gang, hulle verander nie van koers nie.

⁸ En die een druk nie die ander nie, elkeen gaan sy pad. Hulle val tussen die wapens, maar hulle stop nie.

⁹ Hulle bestorm die stad, hulle hardloop op die muur. Hulle klim in die huise, hulle gaan by die vensters in soos 'n dief.

¹⁰ Die aarde sal voor hulle bewe, die hemelsal skud. Die son en maan word donker, en die sterre trek hulle glinstering terug.

¹¹ En יהוה sal Sy stem voor Sy leër verhef, want Sy leër is geweldig groot, want magtig die dader van Sy woord. Want die dag van יהוה is groot en uitermate vreeslik, en wie kan dit verduur?

¹² "Maar selfs nou", sê יהוה, "keer terug na My met julle hele hart, en met vas en met gehuil en met getreur."

¹³ En skeur julle hart en nie julle klere nie, en keer terug na יהוה julle Elohim, want Hy bewys guns en is barmhartig, geduldig en groot van goedheid, en Een wat berou het oor die teëspoed.

¹⁴ Wie weet – Hy mag omdraai en berou hê, sodat Hy 'n seën agterlaat, 'n graanoffer en 'n drankoffer aan יהוה julle Elohim?

¹⁵ Blaas die ramshoring op Tsjion, sonder 'n vasdag af, roep 'n vergadering saam!

¹⁶ Versamel die volk, sonder die gemeente af, vergader die oudstes, versamel die kinders en die suiglinge! Laat 'n bruide-

gom uit sy kamer kom en die bruid uit haar slaapkamer.

¹⁷ Laat die priesters, die dienaars van יהוה, tussen die voorportaal en die altaar huil en sê: "Spaar, יהוה, U volk, en moenie U erfdeel aan vernedering oorgee, sodat die heidene hulle regeer nie. Waarom sou hulle tussen die volke sê: 'Waar is hulle Elohim?'"

¹⁸ En laat יהוה jaloers wees vir Sy land en Sy volk bejammer.

¹⁹ En laat יהוה antwoord en aan Sy volk sê: "Kyk, Ek stuur vir julle graan en mos en olie, en julle sal daarvan versadig word. En Ek maak julle nie meer 'n voorwerp van vernedering onder die heidene nie.

²⁰ "En Ek sal die Noordlikes, van julle af verwyder en dit wegdryf na 'n droë en verlate land, sy voorkant na die oostelike see en sy agterkant na die westelike see. En sy stank sal opstyg, en 'n slegte reuk uit hom opgaan, want hy het groot dinge gedoen!

²¹ Moenie bang wees nie, grond, juig en wees bly, want יהוה doen groot dinge!

²² Moenie bang wees nie, diere van die veld, want die weivelde van die woestyn spruit uit, want die bome dra hulle vrugte, die vyeboom en die wingerdstok lewer hulle krag!

²³ "Dan sal julle, kinders van Tsjion, bly wees en in יהוה julle Elohim juig, want Hy sal aan julle die Leraar van Geregtheid gee en die reën op julle laat afkom, die vroeë reën en die laat reën, soos voorheen.

²⁴ "Dan sal die dorsvloere vol graan wees en die vate sal oorloop van mos en olie.

²⁵ "En Ek sal julle vergoed die vir jare wat die sprinkaan, die voetganger, die kaalvreter en die afknyper verslind het - My groot leër wat Ek teen julle gestuur het.

²⁶ "En julle sal eet – eet en versadig wees – en die Naam van יהוה julle Elohim prys wat wonderbaarlik teenoor julle opgetree het. En My volk sal in ewigheid nie skaam

wees nie.

²⁷ "En julle sal weet dat Ek in die midde van Jisra'ël is, en dat Ek יהוה julle Elohim is, en niemand anders nie. En My volk sal in ewigheid nie skaam wees nie.

²⁸ "En daarna sal Ek My Gees uitgiet op alle vlees. En julle seuns en julle dogters sal profeteer, julle ou mense drome droom, julle jongmense visioene sien.

²⁹ "En ook op die dienaars en op die dienaresses sal Ek in daardie dae My Gees uitgiet.

³⁰ "En Ek sal tekens gee in die hemele en op die aarde: bloed en vuur en rookwolke.

³¹ "Die son sal verander in duisternis en die maan in bloed, voor die groot en vreeslike dag van יהוה kom.

³² "En elkeen wat die Naam van יהוה aanroep, sal gered word.^a Want op die berg Tsjion en in Jarushalajim sal daar verlossing^b wees soos יהוה gesê het, en tussen die oorblywendes, die wat יהוה sal roep.

3 "Want kyk, in daardie dae en in daardie tyd wanneer Ek die ballingskap van Jahuda en Jarushalajim verander,² dan sal Ek al die heidene versamel en hulle afbring na die Vallei van Jahóshafat. En Ek sal hulle daar oordeel oor My volk en My erfenis, Jisra'ël wat hulle tussen die heidene verstrooi het, en My land wat hulle verdeel het.

³ "En hulle het die lot oor My volk gewerp en 'n jong seun vir 'n hoer gegee en 'n meisie verkoop vir wyn en dit gedrink.

⁴ "En ook, wat is julle vir My, Tsor en Tsidon en al die landstreek van Paleshet? Wil julle My vergeld? En indien julle My wil vergeld, sou Ek vinnig terug keer en julle dade op julle kop laat neerkom.

⁵ "Want julle het My silwer en My goud geneem en My kosbare skatte in julle

tempels gebring.

⁶ "En julle het die seuns van Jahuda en die seuns van Jarushalajim aan die seuns van Jawan verkoop, om hulle ver van hul gebied te verwyder.

⁷ "Kyk, Ek sal hulle laat opstaan uit die plek waarheen julle hulle verkoop het, en Ek sal julle dade op julle kop laat terug keer.

⁸ "En Ek sal julle seuns en julle dogters aan die seuns van Jahuda verkoop, en hulle sal hul aan die Shebeërs verkoop, aan 'n verafgeleë volk. Want יהוה het gepraat."

⁹ Roep dit uit tussen die heidene, "Maak gereed vir oorlog! Maak die helde wakker, laat al die krygsmanne nader kom, laat hulle opkom!

¹⁰ "Smee swaarde van julle ploë en spiese van julle snoeimesse, laat die swakke sê: 'Ek is sterk.'"

¹¹ Haas julle en kom, alle heidene en versamel julle rondom. Laat U helde, יהוה, daarheen aftrek!

¹² "Laat die heidene aangewakker word en optrek na die Vallei van Jahóshafat. Want daar sal Ek sit om oor al die heidene reg rondom te oordeel.

¹³ "Steek die sekel in, want die oes is ryp! Kom, gaan af, want die parskuip is vol, die vate loop oor, want hulle boosheid is groot."

¹⁴ Massas, massas in die vallei van beslissing! Want die dag van יהוה is naby in die vallei van beslissing!

¹⁵ Die son en maan word donker, en die sterre trek hulle glinstering terug.

¹⁶ En יהוה sal uit Tsjion brul, en Sy stem uit Jarushalajim verhef. En die hemele en aarde sal bewe, maar יהוה sal 'n toevlug wees vir Sy volk en 'n vesting vir die kinders van Jisra'ël.

¹⁷ "Dan sal julle weet dat Ek יהוה julle Elohim is, wat op Tsjion woon, My

^a Hand 2:21; Rom 10:13

^b Jes 4:2-3; Obad :17; Opb 14:1

JO'ĒL 3

afgesonderde berg.^c En Jarushalajim sal afgesonderd wees en vreemdelinge sal nie meer deur haar trek nie.

¹⁸ "En op daardie dag sal die berge drup van mos en die heuwels vloei van melk. En al die spruite van Jahuda stroom met water, en 'n fontein sal uit die Huis van יהוה kom om die vallei Shittim nat te maak.

¹⁹ "Mitsrajim sal 'n verwoesting word, en Edom 'n verwoeste wildernis, weens die geweld wat hulle aan die kinders van Jahuda gedoen het, wie se onskuldige bloed hulle in hul land vergiet het.

²⁰ "Maar Jahuda sal vir ewig bly, en Jarushalajim van geslag tot geslag.

²¹ "En Ek sal hulle bloed reinig, wat Ek nie gereinig het nie.^d En יהוה sal in Tsjion woon!

^c 3:21; Jes 12:6; 16:5; 46:13; 52:8; 59:20; Teh 102:16; Jehez 43:7-9; Mig 4:7-8; Tsef 3:14-17; Zek 1:16-17; 2:10; 8:3-8; 14:1-11; Hand 1:6-7; Opb 21

^d Of "En Ek sal hulle bloed wreek, wat Ek nie gewreek het nie."